

Moviment sin il sector da la sanadad

70 milliardas e nagina fin

DA LUCAS DEPLAZES / ANR

■ **Trais politichers han inoltrà propostas al cussegl federal ed al incumbensà da prender mesiras necessarias per franar ils custs per la sanadad publica. La Svizra romanda vul ina cassa unitara.** Onn per onn s'augmentan ils custs per la sanadad publica per var quatter pertschient, cumbain che la chareschia va enavos. Actualmain pajain nus 70 milliardas francs l'onn. Ina stagnaziun n'è betg da spetgar. La populaziun crescha, la glied vegn pli veglia, la medischina moderna fa progress. Ils custs èn la finala il pretsch per las prestaziuns medicinalas ch'il pievel ha pretendì, scriva «santemedi», ina interpresa da communicaziun e marketing sin il sector da la sanadad.

La politica vegn activa

En ina interpellaziun propona cusseglier naziunal *Thomas de Courten* (pps/BL) al cussegl federal da restrenscher il catalog da prestaziuns e da desister d'intervenziuns mo gjavischavlas. En cas da tractaments da bagatellas duain ils pazients sa participar pli ferm als custs. De Courten vul schluccar l'obligatori ed il sforz da contrahar cun mintga miedi. Cun l'augment da la franchisa duai vegnir rinforzà l'atgna responsabladad. En cas da tractaments exclusivament mo per prolungar la vita en la vegliadetgna duain las prestaziuns da las cassas da malsaun vegnir restrenschidas.

En moziuns pretendan cusseglier dals chantuns *Erich Ettlin* (pcd/OW) e cusseglier naziunal *Christian Lohr* (pcd/TG) da midar la lescha davart l'assicurana da malsauns e da procurar per correcturas en cas che las premias surpassan il svilup da las pajas.

Il cussegl federal prenda posiziun

Il cussegl federal è cunscient che las premias per las cassas da malsauns muntan



Actualmain muntan ils custs da sanadad en Svizra a 70 milliardas francs l'onn.

FOTO O. ITEM

ina gronda grevizza finanziaria per las chasadas privatas. Or da quest motiv ha el formulà en sias strategias «Sanadad 2020» diversas mesiras per franar ils custs per la sanadad. En connex cun la revisiun da las tariffas per ils medis «tarmed» vul Berset reducir ils custs per la sanadad per 700 milliuns francs. Plinavant ha incaricà il departament federal da l'intern ina grupp d'experts – er cun participaziun internaziunala – che duai elavurar novas propostas fin l'atun proxim. Il cussegl federal fa er attent ch'ils chantuns stoppian esser cunscients da lur obligaziun. Ils chantuns èn responsabels per la rait dals ospitals e per la permissiun da novas praticas. Ils chantuns Turi e Lucerna vulan prescriber tgeninas intervenziuns che

ston vegnir exequidas ambulat, quai vul dir senza ospitalisaziun.

La pcd s'engascha per la classa mesauna

Dapi l'introducziun da l'obligatori per la cassa da malsauns l'onn 1996 èn s'augmentadas las premias per dapli ch'il dubel. Las pajas perencunter mo per 20% e la chareschia sulettamain per 12%. Sche var ina terza dals pajapremias po profitar d'ina reducziun sin lur premias – finanziadas cun var quatter milliardas francs da la confederaziun e dals chantuns – èsi cler che la classa mesauna è pertutgada il pli ferm dals augments. Mo ina repartiziun dals custs na tanscha betg, scriva *Gerhard Pfister*, il president da la pcd, en la brochura

«La Politica» dals 11 d'avrigl 2017. Pfister appellescha a las partidas dal center da curregger la situaziun. Ussa è necessari ina nova politica e dapli solidaritad per la classa mesauna. La pcd vul ina discussiun pli intensiva davart questa dumonda. El haja propostas concretas per far meglier, ha Pfister sincerà envers l'anr.

La Svizra romanda vul midadas radicalas

Ils chantuns Genevra e Vad pretendan ina midada radicala dal sistem. Els han sustegnì l'iniziativa dal pievel da l'onn 2014 che preveseva ina cassa unitara per tut la Svizra. Cun duas iniziativa pretendan els dapli suveranità per ils chantuns. Concret vul il chantun Vad crear sin ses territori

«regiuns da sanadad» e reducir ils cas d'ospitalisaziun e la lavur administrativa. Ina tala cassa n'ha beg basegn da far reservas. *Yves Maillard*, il director chantunal da la sanadad, vulesch dapli cumpetenzas per ils chantuns. Tenor ses parairi dovra la Svizra sin il sector da la sanadad damain concorrenza e dapli stadi. Genevra rimna vuschs per ina cassa da malsauns unitara.

34 milliuns potenzial da spargn

Santésuisse ha fatg ina paregliazion cun l'exteriur davart ils pretschs da divers meds d'agid per pazients. Las differenzas èn considerablas. Onn per onn pudess ins spargnar 34 milliuns francs, scriva santésuisse. Santésuisse ha prendì sut la marella ils pretschs dals meds auxiliars per pazients sco apparats per mesurar il sang, apparats per la reanimaziun e meds auxiliars per pazients cun problems d'incontinenza. Sco quai che santésuisse ha erui, pudessan vegnir reducids ils pretschs per products d'incontinenza e cateters per 16.9 milliuns francs, per products per mesurar il zutger dal sang 13.4 milliuns francs e per il diever d'apparats da reanimaziun 3.2 milliuns francs.

Santésuisse ha uss suplitgà l'uffizi federal da sanadad da procurar per las reducziuns dals pretschs sin il 1. da fanadur 2017. Tut en tut pajan las cassas da malsauns mintg'onn var 550 milliuns francs per meds auxiliars. Las cassas da malsauns èn liadas al princip territorial, quai vul dir, ellas dastgan pagar mo meds auxiliars retratgs en Svizra. Ils pretschs vegnan fixads da las autoritads. L'ultima examinaziun dals pretschs datescha da l'onn 2006.